

18/08/1997

Kejayaan ekonomi punca peramal iri hati

KOTA KINABALU, Ahad - Datuk Seri Dr Mahathir Mohamad berkata, serangan terhadap ringgit oleh pihak yang iri hati terhadap kejayaan negara, bagi membuktikan ramalan mereka mengenai ketegangan ekonomi negara ini menjadi kenyataan.

Perdana Menteri berkata, sejak sekian lama mereka meramalkan pertumbuhan ekonomi negara terlalu pantas.

"Pertumbuhan ekonomi negara lapan peratus setahun terlalu cepat dan perlu diperlahankan.

"Bagaimanapun, kita tidak memperlahkannya menyebabkan mereka kecewa dan bertindak untuk menjejaskan ekonomi kita dengan membuat serangan terhadap nilai ringgit yang kemudiannya memberi kesan kepada pasaran saham negara," katanya.

Perdana Menteri berkata demikian ketika berucap merasmikan Hotel Promenade di sini, hari ini.

Turut hadir ialah Ketua Menteri Sabah, Datuk Yong Teck Lee; Speaker Dewan Undangan Negeri Sabah, Datuk Hassan Alban Sandukong; Menteri Penerangan, Datuk Mohamed Rahmat dan Pengerusi Eksekutif Hotel Promenade, Datuk Dr Hashim Wahab.

Menurutnya, dengan memberi tekanan kepada nilai ringgit membuktikan usaha mereka memperlahankan ekonomi seolah-olah berjaya untuk membuktikan ramalan yang mereka buat sebelum ini.

"Kita akan berusaha mengatasinya walaupun bermacam cara mereka gunakan (untuk menjejaskan ekonomi).

"Selagi kita berjaya mengekalkan kestabilan politik dalam negara melalui kerjasama yang kuat bagi menjamin pertumbuhan ekonomi, kita akan terus berjaya," katanya.

Menurutnya, sektor pelancongan mempunyai potensi cerah untuk dibangunkan di negara ini dan sehingga kini antara tujuh hingga lapan juta pelancong melawat Malaysia setiap tahun yang memberi pendapatan RM12 bilion.

"Bagi sesetengah negara, kedatangan pelancong melebihi daripada jumlah penduduk berikutan keupayaan mereka menggerakkan sektor pelancongan di kawasan mereka," katanya.

(END)